

Ancor che venisseno nel suo campo, questo feceno per non se lo tirar a dosso per confinar loro con Trabesonda.

Hor torniamo a Thauris. Portandove de li, andando per Grego, per septe zornate, se trova Arduil paese paterno del signor Sophis, dal qual haverà grandissimo adjuto. Questo paese di Arduil confina da ponente con el paese de Sarvan, dove è la gran città de Samachi, et il paese de Sarvan confina con li Gurgi over giorgiani verso maistro, dove è Themircapi, dicta le porte di ferro; et da questa banda potrà haver soccorso uumeroso sì da giorgiani come da quelli altri paesi nominati. Puol haver *etiam* soccorso grande de Alerzian, che confina da levante col paese de Arduil, et *etiam* de Saru ch'è sopra il mar Caspio. Se potria dir ch'el potesse trazer gente assai dal paese de Strava et Corassan; ma per esser novi sotto il suo dominio, non credo si serva de quelle; se potrà *etiam* servir di bona zente da Spaan et Tamburgan che sono in Media; sichè per concludervi, tengo farà grandi exerciti per esser ben voluto da tutti. et liberalissimo, *ita* che come ho dicto di sopra, me dubito assai dil fatto di Selin.

131 *Sumario di do letere da Corphù, scrite per Hironimo Bidelli soprastante di biscoti, a sier Zacaria Trivixan qu. sier Benedeto el cavalier, date la prima a dì 15 Septembrio 1514, narra le cosse dil Turco et Sophù. Ricevute a dì 7 Octubrio.*

Scrive aver inteso la causa che ha mosso questo Signor turco ad andar contro al Sophi, è per haver esso Sophi recetato in le sue terre Amoroato nevodo de lui Signor turco, et havendo esso Signor turco mandato a dimandar over lo metti in prexon o almeno lo debbi cazar dil suo paexe, par el Sophi non habbi voluto, digando non volerli romper la fede di quanto li havea promesso. Et se intende che el Sophi a quel hora se atrovava da poi passato el fiume Euftrato in una sua terra principal per nome antichamente chiamata Samossata, posta in pianura; si crede per alcuni ch'el Turcho l'anderà a trovar fino a ditto locho et più in là s'el Sophi fuzirà, *maxime* habiando abundantia de victuaria; et ha trovato *etiam* alcuni signori che dà favor a esso Turco, per quanto vien dito. Et fo dito, per una nave venia di Cypro, capitata li a Corphù, aver parlato, dice, li homeni ad alcuni, come il Turco fo roto a dì 15 Avosto, e questo haveano per uno barzoto da Rodi, e queste nove non vien credute, respeto si ha letere

da Costantinopoli de do di questo, e fu vero di la pocha rota l'have e fo di pochi cavali. Li Turchi che sono tornadi et tornano sono homeni inutili, e per questo il Signor turco li de' licentia, perchè non vol poltroni nel suo campo. Et *etiam* è usanza de soldati de fuzir. Et per tutti che vieneno da Costantinopoli et Galipoli, se afferma: de haver auto comandamento Costanzin bassà zenero del Signor, di far altri 100 volti per tenir galie in dito locho di Galipoli, e vien dito lui Costanzin bassà aver mandato gran numero di homeni con istrumenti de tajar legnami per far galie a la volta de Xusopoli, non molto distante da Nicomedia, locho molto più abundante di legnami che Nicomedia, e tanto numero è stà dito, che scrive si vergogna a scriverlo. Et a dì 13 di questo, hore 4 di zorno, zonse qui a Corphù la galia Simitecola, ritornada de Candia, et la galia Foscarina, nuovamente armada, su la qual xè domino Bernardo Barbarigo vien capitano di Candia, la qual galia è venuta a trovar il provedador zenerale e l' Simitecolo rimanerà de qui. *Etiam*, è qui la nave di Nicolosi carga di orzi di raxon di la Signoria nostra, vien di Cypro, etc.

*Et dil dito, data 21 Septembrio in Corphù.* 131\*  
Come, da poi le ultime di 15, si ha per letere di Galipoli di 16 di Avosto, che in quel zorno de li si ave letere di Alibeì, qual si atrovava in campo con el Signor Selim turco de dì 26 Lujo, per la qual non se intendeva cossa alguna, ma per el messo che portò le letere, si ha inteso che ditto Turcho si havea partito da Cesarea dove era stato per avanti, et se atrovava in Erzingan, dove fono date diete letere, et il Signor havea terminato seguitar el Sophi et andar in Thauris, ch'era lontan da quel locho concani 35. E per quanto vien dito, il campo dil Turcho in uno zorno fa do concani, che saria zornate 17 1/2, e che credea che i campi, s'el Sophi volesse aspetar, se afronteria. Per tutto el dito mese de Avosto havea el campo turchescho alquanto patito per i cavalli, li homeni non tanto; e che al partir de ditto messo, in quel paese era gran fredo. Havea dito Sophi mandato uno suo ambador al dito Signor turco, qual havea fato prender et darli alcuni martori; chi crede che l' habi fato tal cossa per veder se lui ambador fusse venuto li per spion dil Sophi; altri crede per dispresio soo. Scrive pur che se sia, ha inteso da persone da conto corphuote, che le cosse del Signor Selim è per andar ben, di questa guerra con el Sophi; et che si credea che i populi de la Natolia subditi a lui Signor turco, se voltasse contra di lui respeto